

欽定全唐文

欽定全唐文卷八百十六目錄

新文藝出版社叢書

袁循

修黃庵神廟記

白鴻儒

莫孝肅公詩集序

李濬

慧山寺家山記

邢筠

佛頂尊勝陀羅尼經幢讚

韋昌明

越井記

柳玭

大唐萬壽寺記

戒子孫

家訓

惠寔

蠶山廟碑記

殷盈孫

誅襄王燭不宜受賀奏

駁三后祔享太廟議

請廢德明等四廟議

修宗廟議

論郊祀內臣朝服疏

馬支

釋大方廣佛新華嚴經論主李長者事迹

欽定全唐文卷八百十六

袁循

循乾符中官司戶參軍

修黃魔神廟記

咸通末歲今翰林舍人蘭陵公自右史竄黔南秋八月二十七日泝三峽次秭歸時蜀水方漲橫濤蔽日公積悸而寢夢神人赤髮碧眸且云險不足懼公異之再寢又夢公詰其所自則曰我黃魔神居紫極宮之隅將祐助明公出於北境公曰吾斥去荒徼危殆未已神能惠我何也以朝

夕期幸與我俱遠遊我不忘矣亟言之神許諾自是抵於
黔又遷於羅每陟險艱神悅如在洎公遷於朝神夢告歸
公曰將移廟列塑於宮之傍丁酉歲公從弟旡自澧陽尹
亞西蜀路出祠下以囊金致公意謂前制不專請別修敬
太守清河公承命感異親營之心既旣陳層軒以新神樂
來斯靈儀蹲蹲按靈寶經南方有大魔其中央曰黃天魔
王橫天瞻力謂能力扶昊蒼周覆萬有天其或者以公有
宏濟之業將扶危定傾作鎮天步俾黃魔降鑒爲公之兆
睠乎噫天爲功必藉於大賢神之靈固輔於有德是必有

鴻猷盛績萃於公之心未可知也循以學官謫徙歸奉太
守命弗敢讓所記乾符丁酉歲仲春九日司戶參軍袁循
記

白鴻儒

鴻儒乾符時人

莫孝肅公詩集序

唐宣宗大中五年龍集辛未設科求賢合天下士對策於
大廷臚傳以莫公宣卿爲第一公字仲節廣南封州人也
所產之鄉曰文德所居之里曰長樂厥考諱曰讓仁雖不

仕亦有隱德蚤年不祿公母梁氏恐公孤立無倚改適繼父亦莫氏諱及芝乃開建籍也公隨母往并而爲昆仲者三長曰莫儔次曰莫羣公年最少乃其季也繼父亦樂善好施歲歉則出粟以周鄰里嘗遣二兄習讀公幼在側天性迥異聞言卽悟甫七歲資識豁然手不釋卷過目輒成誦時人目爲神童入郡庠從遊於梁明甫先生梁母尤嚴於內訓試於有司薦於大廷對揚清問首魁天下初典翰林未服官政後以母老具表陳情乞官外補以便就養上可其奏賜官台州別駕歸省迎母未至官所而尋卒故里

葬之於文德鄉鑼鼓岡咸通九年封州刺史李邦昌上其事於朝欽奉上勅爲唐正奏狀元莫孝肅公祀以廟食表其里居曰文德蠲其賦稅以充丞嘗之需永爲常典公自幼以至登第所撰詞賦詩歌皆操筆立成誦而咏之如真金美玉不落形迹如化工生物不事妝點而生氣宛然如在也及今公族子姓言動氣象猶有公之遺風雖鄉曲五尺童子與夫田野愚夫愚婦皆重公名莫不喜談樂道之凡遊於庠序者罔不賢其賢守其宗祀者莫不親其親得非狀元公神化之所感也耶是請也公之嫡孫莫立之郡

之庠生也述公行實以告且請予爲記以垂悠久余無似
叨治公郡恨弗獲覩公而徒慕公也因以爲記云時有唐
乾符五年歲在甲午秋仲望日

李濬

濬僖宗時人

慧山寺家山記

金陵之屬郡毗陵南無錫縣有佛寺曰慧山寺濬家山也
貞元元和中先丞相太尉文肅公心寧邑養家寓是縣因
肄業於慧山始年十五六至丙戌歲擢第歸寧爲朱方強

畱之文肅公窺畏常驚切於旦夕之間李庶人以反狀聞
嘗召公草不順章檄公語以君臣父子忠孝誠節別白自
古道理者約千餘言言既勁勇庶人畏敬又逼以狂卒圍
以兵刃促公下筆振叱數四髮皆見怒狀庶人因令閉之
於別所命許縱成之是夜張子良裴行立共義公忠赤果
相與易圖庶人兵敗公以忠節聞於天下新帥李公元素
欲具事表於朝廷公三讓之遂退歸慧山寺僧房猶孜孜
勤經史洎十年手寫書籍前後約五百軸寺山之泉獨稱
奇能發諸茗顏色滋味公僻居舍飲雖崇貴未嘗輒自優

奉惟輦載慧山泉數千里不問其費耗公文學官業功德
濬謹纂敘制詔章表堂狀類列其間不敢輒以文飾表至
敬也爲上下卷今藏史閣我家之盛嘗二爲相三爲史官
高祖中書令謚文憲儀鳳中爲中書令如意中爲鸞臺左
相先公丞相贈太尉謚文肅會昌中爲左僕射門下相儀
鳳在相監修國史會昌在相監修國史乾符四年濬自祕
書省校書郎爲丞相榮陽公獨狀奏入直史館會己亥歲
春有事白相府乞假東出函谷關數千里夏五月癸卯過
家出覩舊刻石詩題別無碑版敘錄懼年祀寢遠不得布

聞於人謹以史筆條敘於寺之正殿內時乾符六年夏五
月十六日甲辰書

邢筠

筠乾符時人

佛頂尊勝陀羅尼經幢讚

蓋聞佛力無邊教化各異靜而思之同歸一體至如尊勝
陀羅尼經者應佛陀波利之願也原夫起自西天流於東
土初從梵本後譯唐言是苦海之津梁實人民之舟楫但
有迴向無不蒙益爰有清信士陳宗可等並久親善道早

悟佛乘知聚沫之無堅視芭蕉之速朽故孜孜金地稽首
高僧披露至誠欲結尊勝寶幢之會僧闕二隨順轉闕三
合結無上勝因闕二當是妙乘諸公意無先後遂令藏鑑

金地買石他山召募良士精心礪未渝數旬琢磨當就

雕鐫既罷樹立俄成巍巍也勢聳於青霄闕二也形闕一

於碧落莫不睹之罪闕三

福生七闕三

角之身三塗息泥

犁之苦然後願合會老幼普獲休祥在軍者爵祿咸臻經
求者資財驟聚復願人人增壽攸歸鶴闕一之字闕五形闕二

字寒林之三秀如斯功德浩汗無涯以百千舌歎不能盡

筠之無德謬忝諸生不揆荒虛畧而爲讚讚曰

彼尊勝者起自西天教中之寶法中之先諷之誦之永離

蓋纏三塗未受七

闕一

休

闕一

結會歸敬獲福無邊鑄

闕三

字永保貞堅

韋昌明

昌明嶺南人乾符五年官翰林學士

越井記

南越王趙佗氏昔令龍川時建池於嶅湖之東阻山帶河
四面平曠登山景望惟此爲中厥土沃壤草木漸包墾闢

定規制北距嶅十里東距五馬峯五里南距河里許相對
卽海珠山也鑿井於治之東偏曰越井取春秋時爲南越
戰國屬楚爲百粵秦首置南海卽以龍川隸焉則越之封
肇於春秋而龍之壤則啟自越王佗也井周圍爲二丈許
深五丈雖當亢旱萬人汲之不竭其源出嶅山泉極清冽
味甘而香自秦距今八百七十餘年其蹟如新稽史記列
傳稱漢旣平中國而佗能集揚越以保南藩稱職貢則佗
之績良足爲多又秦徙中縣之民於南方三郡使與百越
雜處而龍有中縣之民四家昌明祖以陝中人來此已幾

三十五代矣實與越井相終始故記之如此乾符五年十

月之吉邑人翰林學士韋昌明記

柳玭

玭天平節度使仲郢子以明經補祕書正字由書判拔萃累轉左補闕擢刑部員外郎出爲嶺南節度副使黃巢陷交廣逃還再遷御史中丞文德元年以吏部侍郎拜御史大夫貶瀘州刺史卒光化初詔復官爵

大唐萬壽寺記

漢長安城本秦離宮也高帝七年長樂宮成自櫟陽徙都

之惠帝視其窄狹乃發長安六百里內男女十四萬六千人及諸侯王列侯從隸二萬人城長安仍賜民爵戶一級長安方三十里內地九百七十三頃八街九陌九市周回六十五里十二城門皆有候蕭望之爲東門候東有三門一宣平門外郭東都門一清明門外郭東平門一霸城門外郭青門霸城門外一里許有萬壽寺焉萬壽寺本梁太尉吳王蕭岑宅隋開皇四年文帝爲沙門曇延立爲延興寺東院莒公蕭琮之堂隋亡捨入寺神龍中中宗爲永泰公主追福改爲永泰寺大中六年請改名僧寺五所化度

寺改爲崇福寺永泰寺改爲萬壽寺溫國寺改爲崇聖寺
經行寺改爲龍興寺奉恩寺改爲興福寺而寺各異其額
也然萬壽一寺宣帝親幸賜額命官造理殿宇廊廡方丈
山門共一百九十七間左右院林二所香地二頃六十餘
畝石佛一尊娑羅樹六株勅度一百二十僧受牒免差入
寺焚修祝延聖壽後淨覺住持能守清規迥出於眾懼寺
年久莫識其端請余爲記俾後人有所據云

戒子孫

大凡門第高者一事墜先訓則異他人雖生可以苟爵位

死不可見祖先地下門高則自驕族盛則人窺嫉實藝懿
行人未必信纖瑕微累十手爭指矣所以修己不得不至
爲學不得不堅夫士君子生於世已無能而望他人用已
無善而望他人愛猶農夫齒莽種之而怨天澤不潤雖欲
弗餒可乎余幼聞先公僕射言立己以孝悌爲基恭默爲
本畏怯爲務勤儉爲法肥家以忍順保交以簡恭廣記如
不及求名如儻來棗官則潔己省事而後可以言家法家
法備然後可以言養人直不近禍廉不沽名憂與禍不偕
潔與富不並董生有云弔者在門賀者在間言憂則恐懼

恐懼則禍至又曰賀者在門弔者在閭言受福則驕奢驕奢則禍至故世族遠長與命位豐約不假問龜蓍星數在處心行事而已昭國里崔山南琯子孫之盛仕族罕比山南曾祖母長孫夫人年高無齒祖母唐夫人事姑孝每旦櫛紳笄拜階下升堂乳姑長孫不粒食者數年一日病言無以報吾婦冀子孫皆得如婦孝然則崔之門安得不昌大乎東都仁和里裴尚書寬子孫眾盛實爲名閥天后時宰相魏元同選尚書之先爲婿未成婚而魏陷羅織獄家徙嶺表及北還女已踰笄其家議無以爲衣食資願下髮

爲尼有一尼自外至曰女福厚豐必有令匹子孫將遍天下宜北歸家人遂不敢議及荆門則裴齋裝以迎矣今勢利之徒捨信誓如反掌則裴之蕃衍乃天之報施也余舊府高公先君兄弟三人俱居清列非速客不二羹載夕食艷葡萄而已皆保重名於世永寧王相國涯居位竇氏女歸請曰玉工貨釵直七十萬錢王曰七十萬錢豈於女惜但釵直若此乃妖物也禍必隨之女不敢復言後釵爲馮球外郎妻首飾涯曰爲郎吏妻首飾有七十萬錢其可久乎馮爲賈相國餗門人賈有奴頗橫馮愛賈召奴責之奴

泣謝未幾馮晨謁賈賈未出有二青衣齋銀器出曰公恐
君寒奉地黃酒三杯馮悅盡舉之俄病渴且咽因暴卒賈
爲嘆息出涕卒不知其由明年王賈皆遭禍噫王以珍玩
爲物之妖信知言矣而不知恩權隆赫之妖甚於物耶馮
以卑位貪貨不能正其家忠於所事不能保其身不足言
矣賈之臧獲害客於牆廡之間而不知欲始終富貴其可
得乎舒相國元與與李繁有隙爲御史鞫譙獄窮致繁罪
後舒亦及禍今世人盛言宿業報應曾不思視履考祥事
歟夫名門右族莫不由祖考忠孝勤儉以成立之莫不由

子孫頑率奢傲以覆墜之成立之難如升天覆墜之易如燎毛余家本以學識禮法稱於士林比見諸家於吉凶禮制有疑者多取正焉喪亂以來門祚衰落基構之重屬於後生夫行道之人德行文學爲根株正直剛毅爲柯葉有根無葉或可俟時有葉無根膏雨所不能活也至於孝慈友悌忠信篤行乃食之醯醬可一日無哉

家訓

夫門第高者可畏不可恃可畏者立身行已一事有墜先訓則罪大於他人雖生可以苟取名位死何以見祖先於

地下不可恃者門高則自驕族盛則人之所嫉實藝懿行
人未必信纖瑕微累十手爭指矣所以承世胄者修己不
得不懇爲學不得不堅夫人生世以己無能而望他人用
以己無善而望他人愛無狀則曰我不遇時時不急賢亦
繇農夫齒莽種之而怨天澤之不潤雖欲弗餒其可得乎
予幼聞先訓講論家法立身以孝悌爲基以恭默爲本以
畏怯爲務以勤儉爲法以交結爲末事以棄義爲凶人肥
家以忍順保友以簡敬百行備疑身之末周三緘密慮言
之或失廣記如不及求名如儻來去恠與驕庶幾減過往

官則潔已省事而後可以言守法守法而後言養人直不
近禍廉不沾名廩祿雖微不可易黎甿之膏血棟楚雖用
不可恣褊狹之胸襟憂與福不偕潔與富不並比見家門
子孫其先正直當官耿介特立不畏強禦及其衰也唯好
犯上更無他能如其先遜順處己和柔保身以遠悔尤及
其衰也但有暗劣莫知所宗此際幾微非賢不達夫壞名
舊已辱先喪家其失尤大者五宜深志之其一自求安逸
靡甘淡泊苟利於己不恤人言其二不知儒術不悅古道
情前經而不恥論當世而解頤身既寡知惡人有學其三

勝己者厭之佞己者悅之唯樂戲譚莫思古道聞人之善
嫉之聞人之惡揚之浸漬頗僻銷利德義簪裾徒在廝養
何殊其四崇好慢遊耽嗜翹葉以銜盃爲高致以勤事爲
俗流習之易荒覺已難悔其五急於名宦曠近權要一資
半級雖或得之眾怒羣猜鮮有存者茲五不謹甚於瘡痏
瘡痏則砭石可瘳五失則巫醫莫及前賢烟誠方冊具存
近代覆車聞見相接夫中人以下修辭力學者則躁進患
失思展其用審命知退者則業荒文蕪一不足採唯上智
則研其慮博其聞堅其習精其業用之則行舍之則藏苟

異於斯豈爲君子

惠寔

寔乾符六年官比部郎

蠡山廟碑記

越相蠡與大夫種左右勾踐竟成霸業乃謀自全之道輕齊閒行浮海適齊自稱鴟夷子或云平吳之後潛遯之五湖故今之赤山卽洞庭湖之鄙也五湖之說不同愚謂後人所在慕德而祀焉耳廟在六國後置靡究厥始至皇朝天寶六載有勅封表其山亦嘗爲塞胡祠會昌年廢之而

廟亦隨歇有武夷山人陳庶慕止學業誘化村坊捐金帛而鞠之以其祈禱無不應也史記曰荆人鬼而越人機其來尚矣庶因進士賈纁請愚爲記若其地形峭絕山川向背卽備於陳庶之狀云

殷盈孫

盈孫贈司空侑孫廣明初爲成都諸曹參軍僖宗在蜀擢太常博士轉祕書少監終大理卿贈吏部尚書

誅襄王煜不宜受賀奏

伏以僞煜違背宗社僭竊乘輿欺天之禍旣盈盜國之罪

斯重果至覆敗以就誅夷九重之妖祲旣除萬國之生靈
共慶宜陳賀禮以顯皇猷然物議之間有所未允臣按禮
經公族有罪獄旣具有司聞於公曰某之罪在大辟君曰
赦之如是者三有司走出致刑君復使謂之曰雖然固當
赦之有司曰不及矣君爲之素服不樂三日左傳衛君在
晉衛臣元咺立衛君之弟叔武衛君入國叔武爲前驅所
殺衛君哭之左氏書焉今僞燼皇族也雖犯殊死之罪宜
就屠戮其可以朝羣臣而受賀乎臣以僞燼允係金枝名
標玉牒迫脅之際不能守節効死而乃甘心逆謀罪實滔

天刑不可赦已爲軍前處置宜卽黜爲庶人絕其屬籍其
首級仍委所在以庶人禮收葬大捷之慶當以朱政首級
到日稱賀爲得其宜上不軫於宸衷下無傷於物體協禮
經之旨祛中外之疑

駁三后祔享太廟議

臣謹按三太后憲宗穆宗之后也二帝已祔太廟三后所
以立別廟者不可入太廟故也與帝在位皇后別廟不同
今有司悞用王彥威曲臺禮禘別廟太后於太廟垂戾之
甚臣竊究事體有五不可曲臺禮云別廟皇后禘祔於太

廟祔於祖姑之下此乃皇后先崩已造神主夫在帝位如昭成肅明元獻昭德之比昭成肅明之崩也睿宗在位元獻之崩也元宗在位昭德之崩也肅宗在位四后於太廟未有本室故創別廟當爲太廟合食之主故禘祔乃奉以入饗其神主但題云某謚皇后明其後太廟有本室卽當遷祔帝方在位故皇后暫立別廟耳本是太廟合食之主故禘祔乃升太廟未有位故祔祖姑之下今恭僖貞獻二太后皆穆宗之后恭僖會昌四年造神主合祔穆宗廟室時穆宗廟已祔武宗母宣懿皇后神主故爲恭僖別立廟

其神主直題云皇太后明其終安別廟不入太廟故也貞獻太后大中元年作神主立別廟其神主亦題爲太后並與恭僖義同孝明咸通五年作神主合祔憲宗廟室憲宗廟已祔穆宗之母懿安皇后故孝明亦別立廟是懿宗祖母故題其主爲太皇太后與恭僖貞獻亦同帝在位后先作神主之例今以別廟太后神主祔祭升享太廟一不可也曲臺禮別廟皇后祔祔於太廟儀注云內常侍奉別廟皇后神主入置於廟庭赤黃褥位奏云某謚皇后祔祔祔享太廟然後以神主升今卽須奏云某謚太皇太后且太

廟中皇后神主二十一室今忽以皇太后入列於昭穆二不可也若但云某謚皇后卽與所題都異神何依憑此三不可也古今禮要云舊典周立姜嫄別廟四時祭薦及祫於七廟皆祭惟不入太祖廟爲別配魏文思甄后明帝母廟及寢依姜嫄之廟四時及祫皆與諸廟同此舊禮明文得以爲證今以別廟太后祫祫於太廟四不可也所以置別廟太后以孝明不可與懿安並祔憲宗之室今祫享乃處懿安於舅姑之上此五不可也且祫合祭也合猶不入太祖之廟而況於祫乎竊以爲並皆祫於別廟爲宜且

恭僖貞獻二廟比在朱陽坊禘祫赴太廟皆須備法駕典禮甚重儀衛至多咸通之時屢遇大饗耳目相接歲代未遙人皆見聞事可詢訪非敢以臆斷也或曰以三廟故祫祫於別廟或可矣而將來有可疑焉謹按睿宗親盡已祧今昭成肅明二后同在夾室如或後代憲宗穆宗親盡而祧三太后神主其得不入夾室乎若遇禘祫則如之何對曰此又大悞也三太后廟若親盡合祧但當闕而不享安得處於夾室禘祫則就別廟行之歷代已來何嘗有別廟神主復入太廟夾室乎禘祫禮之大者無宜錯失

請廢德明等四廟議

臣以德明等四廟功非創業義止追封且於今皇帝年代極遙昭穆甚遠可依晉韋宏屋殿乃已之例因而廢之

修宗廟議

太廟制度歷代參詳皆符典經難議損益謹按舊制十一室二十三間十一架垣墉廣袤之度堂室淺深之規階陛等級之差棟宇崇低之則前古所謂奢不能侈儉不能踰者也今以朝廷帑藏方虛費用稍廣須資變禮將務從宜固不可易前聖之規模狹大朝之制度當憑典實別有參

詳謹按至德二年以太廟方修新作神主於長安殿安置
便行饗告之禮如同宗廟之儀以俟廟成方爲遷祔當時
議論無所是非今者京城除大內正衙外別無殿宇伏聞
先有詔旨且以少府監大廳權充太廟伏緣十一室於五
間之中陳設隘狹伏請接續廳之兩頭成一十室薦饗之
三太后廟卽於監內西南別取屋宇三間且充廟室候太
廟修奉畢日別議遷祔

論郊祀內臣朝服疏

臣昨赴齋宮見中尉樞密內臣皆具朝服臣尋前代及國

朝典令無內官朝服制度伏以皇帝陛下承天御歷聖祚
中興祇見宗祧克陳大禮皆稟高祖太宗之成制必循虞
夏商周之舊經軒冕服章式遵彝憲若內官要衣朝服令
依所守官本品之服事雖無據粗可行之臣忝禮司合具

陳奏

馬支

支咸通時自號雲居散人

釋大方廣佛新華嚴經論主李長者事述

李長者諱通元莫詳所自或有詢其本者但言滄洲人開

元二十七年三月望日曳策荷笈至於太原孟縣西四十
里同穎鄉村名大賢有高山奴者尚德慕士延納無倦長
者徑詣其門山奴諦瞻神儀知非常器遂磬折禮接請歸
安居每旦唯食棗十顆柏葉餅子如七大者一枚自爾不
交外人掩室獨處舍毫臨紙曾無虛時如是者三稔一旦
捨山奴南去五六里至馬氏古佛堂自構土室寓於其側
端居宴默於茲十年後復囊挈經書遵道而去三十里餘
次韓氏別業卽今冠蓋村焉忽逢一虎當途馴伏如有所
待長者語之曰吾將著論釋華嚴經可與吾擇一棲止處

言畢虎起長者徐而撫之將所挈之囊挂於虎背任其所
止於是虎望神福山原直下三十餘里當一土龕前便自
蹲駐長者旋收囊裝置於龕內虎乃屢顧妥尾而去其龕
瑩潔圓迥廣袤尋丈自然而有非人力成龕之四旁舊無
泉澗長者始來之夕風雷暴作拔去一古松高三百餘尺
及旦松根之下化爲一潭深極數尋迴環五十餘步甘逾
瑞露色奪琉璃時人號爲長者泉至今澄明未曾增減憊
陽之歲祈之必應長者製論之夕心窮元奧口出自光昭
耀龕中以代燈燭居山之後忽有二女子容華絕世皆可

笄年俱衣大布之衣悉以白巾幪首姓氏居處一無所言常爲長者汲水焚香供給紙筆卯辰之際輒具淨饌甘珍畢備置長者前齋罷徹器莫知所止厯於五祀曾不闕時及其著論將終遂爾絕迹謹按華嚴舊傳東晉三藏佛駁跋陀羅於江都謝司空寺譯經有二青衣童子忽自庭沼而出承事梵僧爇香添瓶不離左右每欲將夕還潛沼中日日皆然率以爲常事及譯畢寫淨沈默無迹長者感通事符曩昔長者身長七尺二寸廣眉朗目丹脣紫肌長髯美茂修齊圓直髮彩紺色毛端右旋質狀無倫風姿特異

殊妙之相靡不具足首冠樺皮之冠身披麻衣長裾博袖
散腰而行亦無韋帶居常跣足不務將迎放曠人天無所
拘制忽一日出山訪舊止之里適值野人聚族合樂長者
徧語之曰汝等好住吾將欲歸眾乃罷樂驚惶相顧咸皆
惻愴必謂長者卻還滄洲揮涕同詞懇請畱止長者曰縱
在百年會當歸去於是舉眾卻送長者入山至其龕所復
語之曰去住常然耳汝等可各還家及眾旋踵之頃嵐霧
四起景物不行路之人咸共駭異翌日長叟結徒登山
禮候但見姿容端儼已坐化於龕中矣時當三月二十八

日報齡九十六有一巨蛇蟠當龕外張目呀口不可向近
眾乃歸誠致祝某等今欲收長者全身將營殯葬乞潛威
靈願得就事蛇因攝形不現耆舊潛泣輦荷擇地於大山
之陰累石爲墳蓋取堅淨卽神福山逝多蘭若今方山是
也初長者隱化之日及成墳之時煙雲凝布巖谷震蕩有
二白鶴哀唳當空二鹿相叫連夕其餘飛走悲鳴滿山鄉
原之人相率變服追攀孺慕若喪所天每當建齋卽墳上
雲起七七如是良足異夫長者平昔之時每年常於三月
末間設十方賢聖淨會不以女人造食貴使蠲事精誠至

於棗核米泔不許輒棄齋畢任用大彘偏霑如斯之會遵
承到今未曾廢絕至大厯九年二月六日有僧廣超於逝
多蘭若獲長者所著論二部一是大方廣佛新華嚴經論
四十卷一是十二緣生解迷顯智成悲十明論一卷傳寫
揚顯徧於并汾廣超門人道能繼師志肩負二論同遊
燕趙昭示淮泗使後代南北學人悉得參閱論文宗承長
者皆超光二僧流布之功耳其爲論也統貫經義標表法
身廓性海於無邊厯劫塵而不動分判衆教極彼源流融
鎔上乘會此華藏俾迷徑者獲道滯教者忘機可謂毘盧

之指歸華嚴之日月矣若非聖人愍世降生開導昏暝孰能條釋大典指授大心歟長者行止元微固難遐究虛空不可等度况擬求邊際耶比歲僧元覘特抵方山求長者遺跡初禮石墳次尋龕址龕前有松三株一已闕一立俱

是長者手植長者將化之月一株遂枯至今二株常有靈鶴結巢於頂又於壽陽南界解愁村遇李士源者乃傳論僧之猶子示長者真容圖瞻禮而迴斯爲滿願矣向之云云蓋在摭實枝葉華藻無所務焉雲居散人馬支纂錄

欽定全唐文卷八百十七目錄

楊光

赤石樓隱難記

王景崇

誅蘇祐奏

高彥休

闕史序

黃璞

林孝子傳

王郎中傳

歐陽行周傳

張爲

詩人主客圖序

鄭畧

大道頌

孟啟

本事詩序

趙申昈

唐故居士天水趙府君墓誌銘

并序

杜希道

大還丹金虎白龍論

大還丹金虎白龍論跋

鄭瀆

吹笛樓賦

魯洵

唐台州刺史杜雄墓誌銘

欽定全唐文卷八百十七

楊光

光中和時人

赤石樓隱難記

混茫既分乾坤成列形下曰器積而爲山洎禹別九州漢通百越此山則維揚東甌之地峩峩傑出發地千尋峭削凌空壁懸四面其乃陰陽偏顧造化有情呀開石門路通極頂天生厚土蔭以森羅地廣百家入勝千眾天下靈蹟此乃標奇自平開元之末袁晁作叛起於天台攻陷當州

逃亡無數惟此一鄉人戶數百餘家而登此樓以逃其難乃有兵戈百眾來繞其山飛矢彎弧豈能侵動旣難攻擊莫不相守經旬其恃乃智士而獲良計以米飴豕投於岩下羣盜剖之自相謂曰岩頂積穀尚多我等相守難以待其乏乎遂共奔去而攻他疆其後便乃清平干戈不擾人忘往難無復再遊運轉年移迄今爲古其樓近代居人皆懼有神聖居止及乾符五年趙言奔衝之時不敢登此迴避以至中和二年屢被洞寇侵逼焚却鄉閭兼遂昌數縣軍馬頻來憑陵老幼惶惶倦於深竄乃有耆父河間郡俞

強邀伴攀緣登此樓頂芟夷繁木以創草庵巧立層梯而
通行路遂召鄉鄰老幼共此逃形寢寐安然狂兵攻守無
路侵凌是年五月當州中軍屯營州郭居人投軍眾仇讐
相害村野遭搜近遠逃亡不可勝數此之一鄉而有武都
郡章承趣年當少俊英傑冠時鄉內欽依眾皆推讓蒙兵
馬司僉差部領數百衛士占護家鄉各藏財泉於藪岩共
置軍部於老竹外都畏懼不敢來侵戶口完全耕稼無失
於時太守張公朝望崇重遠降分符撫恤安邦便蒙康泰
當今四境未安內憂侵擾且居岩頂有百餘家並是鄉內

英俊賢明父宿共棲幽境何異神仙余因遊觀奉命爲記時唐中和二年壬寅十一月初八日

王景崇

景崇字孟安贈司空成德軍節度使紹鼎子懿宗朝嗣爲節度以平龐勛功進同中書門下平章事檢校太尉兼中書令封趙國公乾符五年進封常山王檢校太傅中和三年卒年三十七贈太傅謚忠穆

誅蘇祐奏

當道慈谷靈壽兩鎮報蔚州刺史蘇祐擅驅兵騎侵突臣

管界及謀逆辭事尋已處置訖者蘇佑本自微人謬承聖
獎自拋離郡邑竄保山巖臣亦愍以困窮累曾救卹慮其
猖獗每使慰安豈期無惡不爲有兇皆納狐鳴鼠伏曾不
悛心擐甲弄兵嘗思怒目況朝廷道全姑息思務含宏加
騎省之榮資除濮陽之望郡而又拒違明勅悔易天朝擅
割屬城背雲中而納款潛將逆黨附并部以揚威昨者初
犯中山尚深疑貳謂其舉衆將議朝天或捨逆以自新或
樹功而遷善殊不知終懷鳩毒竟務鴟張刦后臼之倉儲
逼冒零之鎮戍旋則亂驅蛇豕入臣封疆陰蓄姦欺伺臣

勇怯臣此時未窮來意詎忍加兵尋令問以行藏兼遣倒其戈甲然終無一字以述端倪累有元隨自陳狀跡云本擬脅臣優給刦臣材廬奮戰馬而以利犬羊招亡命而別謀吞并臣尚觀釁變待以膳羞苟尚可以恩懷且欲候其敕命其賊緣已擬發露自致蒼黃乃與後來敗卒合謀便擬據城作梗臣旣優饒稍過傾覆是虞固難使四郡軍民噬臍貽悔一城生性束手受誅其蘇祐一行徒黨除歿告軍將人數外今月七日並已分兵誅戮訖此皆皇帝陛下雷霆振響宗社垂靈將復致於中興故先除其小醜况此

賊逋藏藪澤招聚兇豪締結厲階爰輕數度包含怨府不
啻十年其寨卽在中山一隅去大同咫尺彼兩鎮不能覆
巢破卵蕩葉夷根者蓋以其兔狡難蹄獸窮則搏顧茲疾
疚實謂腹心苟非天靜寰中曷使魚遊釜內今則櫬槍一
掃噍類無遺凡在邊藩孰不鼓躍

高彥休

彥休自號參寥子

關史序

皇朝濟濟多士聲名文物之盛兩漢纔足以扶輪捧轂而

已區區晉魏周隋已降何足道哉故自武德貞觀而後吮筆爲小說小錄稗史野史雜錄雜紀者多矣貞元大歷已前拾遺無遺事大中咸通而下或有可以爲誇尚者資談笑者垂訓誠者惜乎不書於方冊輒從而記之其雅登於太史氏者不復載錄愚乾符甲午歲生唐世二十有一始隨鄉薦於小宗伯或預聞長者之論退必草於擣網歲月滋久所錄甚繁辱親朋所知謂近強記中和歲齊偷構逆翠華幸蜀搏虎未期鳴鑾在遠旅泊江表問安之暇出所記述亡逸過半其間近屏幃者涉疑誕者又刪去之十存

三四焉共五十一篇分爲上下卷約以年代爲次討尋經史之暇時或一覽猶至味之有菹醢也甲辰歲清和月編次

黃璞

璞字紹山又字德溫閩縣人大順中擢進士第官校書郎
林孝子傳

林孝子攢泉州莆田縣人初舉進士不第仕塞垣後仕不擇祿爲福唐縣尉冀遂迎養未果聞親有疾奔還其家行不俟車食而失哺及罹難疾殆至殞絕漿不濡口往往三

日或五日自延鑄甓營邱隴及踰葬期獨廬墓側飛走助哀神祇薦祉故白鳥再集甘露聯降泉州申使府時貞元癸酉歲李若初廉使茲地深所嘉嘆遣從事親往視驗會天久曠乾露彩融釋攢拊膺大哭曰自盡於其親人子常道貞符之降本非所望向者所降其福我耶其禍我耶今使車將至苟非所驗非餘骸足顧抑將殃乎州里矣逡巡愁雲四合異香中來觸物氤氳成甘露煥然五色鶴然甘味移時不消千木同色靈鳥素質翩翩來翔閩郡共觀無不從驗以是悖者知敬悍者知馴旣圖其狀李公錄以

上奏德宗敦勸孝道降制褒異命立雙闕於其墓旌表門
間舉宗皆蠲征徭厚加爵餼迨今號爲闕下林家歐陽詹
曾序甘露述備詳其事黃子曰天道不遠感而遂通林生
因心之感上達乎天累降祥符坐獲旌表是謂天爵豈下
萬鍾之貴遂登名此書以聳孝道云爾

王郎中傳

王榮字輔之福唐人也咸通三年鄭侍郎讓下進士及第
試倒載干戈賦天驥呈材詩公詞賦清婉托意奇巧有江
南春賦末云今日併爲天下春無江南兮江北又有詔遣

軒轅先生歸舊山賦及馬惜錦障泥詩尤美公風姿雅茂
舉措端詳時賢仰風盛稱人瑞成名歸覲廉使杜公宣猷
請署團練巡官景慕意深將有瑤席之選公辭以舊與同
年陳郎中輩有要約就陳氏婚好時益以誠信奇之初就
府薦馮涯爲試官三箭定天山賦當意爲涯所知欲顯滯
遺明設科第以宋言爲解頭公爲第二旨毅夫中丞尹京
兆怒涯不取旨搃命收榜扱破名第申省其年等第雖破
公道益彰凡曾受品題數年之間及第殆盡前今輿論莫
不美馮公之善得其材榮公之獲在其選從事本府乞假

入關尋又首捷玉不去身賦春水綠波詩古公去邠論李
公隱時擅重名自內翰林出爲江西觀察使辟爲團練判
官自使下監察赴調復平判入等授大理司直未幾除太
常博士入省爲水部郎中公初上第鄉人李顏累舉進士
鬱有聲芳贈公歌詩云蓬瀛上客顏如玉手探月窟如夜
燭笑顧姮娥玉兔言謂折一枝情未足時謂顏狀得其美
若有前知公十九年内三捷其於盛美蓋七閩未之有也
不幸黃巢竊據京闕朝士或辱或戮者不可勝計公旣遇
離亂不知所之或云歸終於鄉里焉

歐陽行周傳

歐陽詹字行周泉州晉江人弱冠能屬文天縱浩汗貞元年登進士第畢闈試薄游太原於樂籍中因有所悅情甚相得及歸乃與之盟曰至都當相迎耳卽灑泣而別仍贈之詩曰驅馬漸覺遠迴頭長路塵高城已不見况復城中人去意旣已甘居情諒多辛五原東北晉千里西南秦一屨不出門一車無停輪流萍與繫匏早晚期相親尋除國子四門助教往樂籍中者思之不已經年得疾且甚乃危壯引鬚刃而匣之顧謂女弟曰吾其死矣苟歐陽生使至

可以是爲信又遺之詩曰自從別後減容光半是思郎半恨郎欲識舊時雲髻樣爲奴開取鏤金箱絕筆而逝及營使至女弟如言徑持歸京具白其事詹啟函閱之又見其詩一慟而卒故孟簡賦詩哭之序曰閩越之英惟歐陽生以能文擢第爰始一命食太學之祿助成均之教有庸績矣我唐貞元己卯歲獻書相府論大事風韻清雅詞旨切直會東方軍興府縣未暇慰薦久之倦遊太原還來帝京卒官靈臺悲夫生於單貧以狗名故心專勤儉不識聲色及茲筮仕未知洞房纖腰之爲蠱惑初抵太原居大將軍

宴席上妓有北方之尤者屢目於生生感悅之留賞累月以爲燕婉之樂盡在是矣旣而南轍妓請同行生曰十日所視不可不畏辭焉請待至都而來迎許之乃訣去生竟以連蹇不克如約過期命甲遣乘密往迎妓妓因積望成疾不可爲也先大故之夕翦其雲髻謂侍兒曰所歡應訪我當以髻爲貺甲至得之以乘空歸授髻於生生爲慟怨涉旬而生亦歿則韓退之作何蕃傳所謂歐陽詹者生也河南穆元道訪予嘗歎息其事嗚呼鍾愛於男女索其效死夫亦不蔽也大凡以時斷割不爲麗色所汨豈若是乎

古樂府詩有華山畿玉臺新咏有廬江小吏更相死類於此

張爲

爲唐末時人與周朴齊名後入青城山訪道而去

詩人主客圖序

若主人門下處其客者以法度一則也以白居易爲廣大
教化主上入室揚乘入室張祐羊士諤元稹升堂廬全顧
況沈亞之及門費冠卿皇甫松殷堯藩施肩吾周元範况
元膺徐凝朱可名陳標童翰卿以孟雲卿爲高古奧逸主

上入室韋應物入室李賀杜牧李餘劉猛李涉胡幽正升
堂李觀賈馳李宣古曹鄴劉駕孟遲及門陳潤韋楚老以
李益爲清奇雅正主上入室蘇郁入室劉畋僧清塞盧休
于鵠楊洵美張籍楊巨源楊敬之僧無可姚合升堂方干
馬戴任蕃賈島厲元項斯薛壽及門僧良乂潘誠于武陵
詹雄衛準僧志定喻鳬朱慶餘以孟郊爲清奇僻苦主上
入室陳陶周朴及門劉得仁李溟以鮑溶爲博解宏拔主
上入室李羣玉入室司馬退之張爲以武元衡爲瓊奇美
麗主上入室劉禹錫入室趙嘏長孫佐輔曹唐升堂盧頫

陳羽許渾張蕭遠及門張陵章孝標雍陶周祚袁不約

鄭畧

畧唐末宰相

大道頌

大哉至道無爲自然不終不始天地先天含光默默永劫
綿綿東訓尼父西化金仙百王取則累聖攸傳萬教之主
元之又元

孟啟

啟僖宗朝官司勲郎中

本事詩序

孟啟

詩者情動於中而形於言故怨思悲愁常多感慨抒懷佳作諷刺雅言著於羣書雖盈厨溢閣其間觸事興詠尤所鍾情不有發揮孰明厥義因采爲本事詩凡七題猶四始也情感事感高逸怨憤徵異徵咎嘲戲各以其類聚之亦有獨掇其要不全篇者咸爲小序以引之貽諸好事其有出諸異傳怪錄疑非是實者則畧之拙俗鄙俚亦所不取聞見非博事多闕漏訪於通識期復續之時光啟二年十一月大駕在褒中前尚書司勲郎中賜紫金魚袋孟啟序

趙申昈

申昈乾符時官左武衛兵曹參軍

唐故居士天水趙府君墓誌銘并序

府君姓趙氏裒天水字別業易州淶水縣頃因先父遷

闕二仕流浪海隅從軍地遠徙居青字闕二世迄今凡二百

年矣先妣夫人太原王氏生公是季子也府君生居於北

海之郡志好雲林山水南北貿賈利有攸往廣涉大川博
學古墳與朋友交言行敦美信義彰聞輕金玉立善外著

孝行六親府君諱琮字光婚夫人太原王氏有男三人長

曰審嚴次曰審裕季曰審文女一人初笄之年適夫陰氏
孟男年居弱冠之秋居然老成安詳大雅合國風之堅操
修行古人立言溫尚可謂父訓有知流嗣千載矣夫人王
氏令淑賢闕一居喪淚血在苦塊之內殞哽蘭干骨髓焚

消闕二

譽聞三從之闕二

導著府君遇軍情變亂不以交

道仇闕一

生涯亦不遭毀爇錢穀湛然上下無虞藜食安

貼乙未歲季夏月五日遇疾青州之私第下於人世丙申

年七月三日命知者卜得吉夕殯於益都縣南五里建德
莊雲門山東墓原禮也慮山河更改松筠彫悴遂紀年代

乃爲銘說銘曰

天水之君蘊志難羣孝行雙美立性松筠卓然孤立在世
推闕一
字

一生好東臯之利滅亡迴返高墳有子賢行傳代光
門女從他氏五德猶存白楊千載滋茂兒孫落日烏啼猿

叫荒村都

闕一
字

思遺念臨棺血淚

闕一
字

生涯終不改兒

女永無依

其闕二
二字

生平事留蹤萬代存

其三

嗣流孤隴下恩

愛向誰論

其四

杜希遁

希遁字忘機自號永陽子

大還丹金虎白龍論

夫燒丹鍊藥須烹龍虎之陰陽駐命存形藉養神氣之魂魄龍癡凝虎陰反成陽虎暗晞龍陽化成寶神融馭氣魄反成魂氣泰神和魂合而聖龍虎相凝成液神氣交馭爲真神水便是華池忘心卽名抱一朝天控鶴須吞真魄之靈丹出世長生藉養精魂之靈氣此則金丹秘訣神仙妙門能以改換精神變化筋骨收卷形體出入而可有可無變現真靈來去而能存能沒乘田變易天地虛翻昇騰而紫府玉清遊歷而碧霄金闕此卽神丹憑驗還返功靈世

人枉鍊五金調和八石呼鉛作虎喚汞爲龍妄配陰陽錯
排水火誇三黃是聖騁五礮爲神道理旣乖聖意全失看
經究義尋本窮元亂立規繩遞生法則不從師授強說已
能斟酌藥名團量火候鑪泥八面壇築三層兜祝神祇祭
醮天地總是憑空造作非理修持不覺體敗形枯顏凋鬚
白虛勞歲月枉役心神而望還丹萬無成耳余久耽雲水
早棄浮華棲止山林精窮物象修神鍊氣反本還元息慮
澄真忘思靜一考覈鉛汞杼軸丹經徹視元洞之金書悟
達三清之玉訣然後敢對持龍虎駕馭陰陽配金木以東

西定坎離而南北陶鎔日月鍊成五色之元霜孕育乾坤化出流光之素雪仙方豈謬聖理昭然一覩元微明其妙旨遂著斯序分列兩篇名金虎白龍論用彰鄙識將表同人儻物外君子幸留意焉

大還丹金虎白龍論跋

時光啟二年冬首中旬有七橫峯先生永陽子杜希道字忘機多事之秋避禍汶郊每抵鄆中祇接大隱南陽公公頗奉道耽元悟真棲心閑雅若夫發跡揚名俟之知已夫爲交者有名焉有利焉余與公交非名與利每一接未嘗

不話道永日除元之又元外餘無所云故書先師藥訣相
贈切希千萬保惜勿傳下士大凡方外之事豈使常人知
之常人知之則自遭譴謫仙師曰欽承者紀名於元錄泄
慢者責身爲下鬼又曰殃慶遠於九祖昇沉止於一形今
以青山白雲爲誓勿負斯言千萬千萬

鄭瀆

瀆僖宗朝文章著名累舉不第

吹笛樓賦

以時平故事有
吹笛樓爲韻

路出東門當川原靜處以凝望見櫓檻蕭然而起愁問於

垂白荷鉏叟云是明皇吹笛樓龍吟洛水兮韻如在鳳去
喬山兮君不留當昔開元之時天下無事鴻恩不間於中
土鑾駕常遊於北地姚公宋公之智畧動必諮謀寧王薛
之忠貞出皆參侍西則秦京東則洛城八百里之歌鐘斷
續五十年之寰海昇平於是駐清蹕御丹楹執簫管而宸
衷時悅臨曲欄而睿思俄生莫不湘絃罷彈泗磬休擊楚
舞態止齊謳韻絕九天歛霧送芳景於瓊軒萬籟韜音讓
嘉名於玉笛旣運指而有規乃濡脣而是吹林巒兮髣髴
如變寒暑兮須臾可移折楊柳之數聲鴈驚前渚落梅花

之一曲鳥散芳枝自從弓劒有遺星霜頻度綺窗蕭索以
將毀繡嶺連延而若故竟無六律繼當時紫府之清音空
有一條是往日翠華之來路雕檐寂寞兮鏤檻堪依隙駟
寧迴兮煙鸞莫追三山迢遞在何處萬姓淒涼無見時宮
商之杳眇難尋雲消雨散懷桷之傾欹若此月慘風悲苟
非德邁三皇化敷九有龍馭雖逝鴻名不朽則斯樓也寂
寞空存安得往來霑襟而稽首

魯洵

洵光啟時官嶺南西道觀察支使

唐台州刺史杜雄墓誌銘

斯照乃有大電呈瑞靈嶽降賢上則一千年以誕

闕簡

冊煥乎古今

闕也

自漢魏至於

闕絕

茂族先世自東晉

過江士族南徙以丹邱

闕

先君禹自安高尚不求祿仕先

君由

闕

春州刺史公卽春州府君第二子也生有奇表

闕

精元孝資溫清敬事昆弟至於疎親遠屬

闕

天下將亂且

歎曰窮理講學將非其時豹畧龍

闕

士之志廉使美其材

署爲平昌討伐使州事承制加御史大夫是時歎儉後

闕

詔兼大司憲恩及師徒惠播閭里

闕

以功上聞

闕

光啟三

年加工部尚書是秋又遷刑部

闕

以正道使知而後改遂

刑措不用

闕

租賦其或稼穡將登有水

闕

不若神明之政

也日者

闕

公率兵拒之羣寇尤

闕

而不用得非良二千石

關金紫是歲復加右揆大

闕

兩浙中令以嘉辭厚

闕

不絕書多竭私

闕

有地千里有爵三公顯赫

闕

未嘗驕於色慄

於國厚於人薄於已古

闕

視政以其月十七日薨

闕

終神氣不亂顧謂

闕

歸勉主郡事言訖而瞑

闕

子撫軍若

一奉上

闕

功成名遂善始令終

闕

碑闕一州罷市

闕

見

字其得人心也如此先大

闕

宏闕歿

闕

繼大闕之養

闕

字是日太君闕二禮闕一閨門道光先公闕一而闕長曰

彥崇闕二

軍節度闕三

將孝以承家謙以處眾生闕三之道

旦明治亂之機入侍庭闈出佐軍旅次曰彥

闕二前節度推官幼曰彥豐並

彥信彥特彥持彥琪彥擇闕二字

彥一闕一彥豐闕一字

俊秀聰敏仰稟義方號慕殞絕者數四女四人皆明惠賢

淑有曹謝之風長適鎮海軍都指揮右揆吳章次方笄年

未良匹次許嫁陳氏卽故閩帥司空公第二子次許嫁錢

氏卽今兩浙中令彭城郡王愛子也副使葉公與左都押

衙師位右都押衙紹香及諸都將親奉喪事各率家財送

往事居知無不至傳曰周人之思召公愛其甘棠况其子
乎公恩施廣於一境可謂貽厥孫謀矣以其年十一月廿
五日葬於郡之義成鄉貞節里一日親吏傳尚書公命曰
子爲賓職復典文翰我先君勲績善政當得其實願爲誌
石以傳不朽洵受恩有日報賜無階陳讓不獲因灑泣銘
曰

五緯降瑞四靈効祥誕生碩臣贊我巨唐奇表岳峙懿行
蘭芳鬱天柱石浮海舟航士懷恩信民謌樂康鳳書錫命
虎符有光軍崇美號義洽故鄉三公爵秩千里憲章化穆

二紀仁被一方威儀棣棣度量汪汪未當分閩俄驚壞梁
望碑掉灑罷市淒涼佳城叶吉丹旐啟行厚地永固遺德
難忘流慶令嗣闕四

字